

Li s'crèt èt lès coméres !

(d'après Jean de la Fontaine)

I-gn-a rin d' si pèsant qu'on s'crèt,
Dji v's-è va tot d' chûte diner l' preûve.
Afîye on côp, on-ome lacherè
On mot quand faureut qu'i s' taîreûve.

Por one comére, c'è-st-on fourdia ;
Po l'aurder, i faut qu'èle li trin.ne.
Télemint pèsant qu' gn-a nul èna
Qu'on n' l'î saureut mète sins qu'i n' jin.ne.

I n'est nin rèquis d' couru lon
Po spaude on s'crèt pa t't-avau l' place.
Doutant su s' feume, on vî soçon
A stî fougû padrî li scwace.

Po l'asprouver, noste ome, dè l' nût
Profite qu'i dwâme èsconte di lèye
Po lî cryî qu'i n'è pout pus :
-Dj'a l'idéye qui dj' va ponre, mi fèye !

Vos dîrîz veûy onk qu'a spaurnî !
Dispû ayîr, ça lance è m' vinte,
I m' faureut sins manque acoûtchî.
Vos savoz bin qu' dji n' di pont d' mintes.

Vo-l'-la tot l' min.me ! Qué bia gros ou,
Tot fris' ponu ! Ç' n'est nin lès pwin.nes
Dè l' raconter. Tot l' monde si fout
Qui ç' fuche da mi ! Mins mi, ça m' jin.ne. »

Li comére, qui c'est l' prumî côp
Qu'èle vèyeut ça, sondje à ôte tchôse ;
Lî djurer qu' nu mot n' mousserè foû
Di s' bouche, quite à-z-î piède si boûsse.

Portant l' lèddimwin au matin,
Ratchaweter, l' comére, à s' vwèsine
Tote li praute, èt rovî s' sèrmint :
-On-ou ossi gros qu'on-ou d' cîne !

Mins gn-a qu'à vos qui dj' raconte ça,
Tinoz l' por vos, ca dji m' freu bate
Pa m'-y-ome qui m' è vôteut au-d'la
D'oyu stî tchanter qu' 'l èst malade.

-Vos v's futoz d' mi ? di-st-èle , li djin.
Si vos-avoz on tch'via qui pinse
Qui dj' sondje à ça, rauyîz l' rad'mint !
Ni v' tracassez nin à non syince. »

Li feume di nosse « poneûs » èrva.
L'ôte, lèye, pèstèle, transit èt paute
Ratchafeter pâr ci èt pâr là :
-I 'nn'a ponu po fé chîs tantes ! »

Co d' chance qu'èle chicheleûve ça tot bas
À l'orèye dès cis què l' choûtin.n' ;
À chaque côp, ragrandi l' moncia,
À l' nêt, gn-aveut bin one cintin.ne.

Qu'èsteut-i div'nu, don, li s'crèt,
Tot passant dè l' bouche à l'orèye ?
T'as bau prètchî, nune ni s' taîrè,
Èle faîyenut tortotes fin parèy !
Lès comères qui m'auront choûté,
Djè l'zî aurè sûr fait dè l' pwin.ne.
Mins dji n' lès voleu nin sbarer :
Dji m'èpoltéye, c'èst ça qu' m'èmwîn.ne.

Aus comères qui, zèles, m'ont r'mètu,
Dji vou seûlemint qu'èle compudenuche
Qui ç' n'èst qu'on d'vwêr qui dj'a ponu,
C'è-st-insi qu' faut qu'èle li pudenuche.

Albert Delvaux.